

CBETA電子佛典集成

CBETA Chinese Electronic Tripitaka Collection
ebook

X26n0572

般若心經易解

清 謝承謨註釋

中華電子佛典協會



目次

- [編輯說明](#)
- [章節目次](#)
 - [般若心經易解](#)
 - [往生淨土神呪](#)
- [卷目次](#)
 - 1.
- [贊助資訊](#)

編輯說明

- 本電子書以「CBETA 電子佛典集成 Version 2023.Q1」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

No. 572

般若心經易解

聖人立世間法。以維持風化。吾佛說出世法。以化導群迷。世出世間。同歸于善。但世間法。不外日用倫常。出世法。乃能轉凡成聖。是尤善中之善也。心經為般若之精華。而出世之捷徑。依此而脩。乃能離苦得樂。非妙法乎。茲因金剛經易解註成。爰類列此經。而並註之。庶幾裨益兼資。以成出世因緣。普願見聞。同登覺路。

時光緒己丑春杪貫三謝承謨書於混勞處

般若波羅密多心經

唐 三藏法師玄奘譯

毗陵 謝承謨貫三氏 註釋

真州 劉紹南圓覺氏

刊上 蔣春同蘭言氏 校訂

刊上 錢松齡覺之氏

此經以單法為名。寔相為體。觀照為宗。度苦為用。大乘為教相。五者。皆經中所說之旨。單法者。即般若波羅蜜也。寔相者。即諸法空相也。觀照者。照見五蘊皆空也。度苦者。度一切苦厄也。大乘者。即菩薩所行甚深般若也。經題稱般若。華言智慧。波羅蜜多。華言到彼岸。眾生由迷慧性。居生死。曰此岸。菩薩由修般若。悟慧性。到涅槃曰彼岸。心者。般若心也。此般若心。人人本具。為說此經。令見本性。經者。常也。法也。

按施護譯本。世尊在靈鷲山中。入甚深光明宣說正法三摩提。舍利子白觀自在菩薩言。若有人欲修學甚深般若法門者。當云何修學。觀自在菩薩遂說此經。即世尊所說大般若經六百卷之精要也。傳至中華凡五譯。今從玄奘所譯者。以中國盛行故也。

觀自在菩薩。行深般若波羅密多時。

行。音恨。般若。音鉢惹。

○觀自在即觀世音也。由其用般若智慧。照了自心清淨。圓融無礙。故稱自在。言菩薩於己道行甚深。乘般若智慧。而到涅槃彼岸之時。

照見五蘊皆空。度一切苦厄。

照者。觀照也。五蘊者。色受想行識也。蘊者。積聚。色者。色身。受者。領納。想者。思想。行者。作造。識者。分別。由有色身而有受想行識。度者。度脫。一切苦厄。世間之眾苦也。言菩薩用觀照之力。而見向之五蘊。皆空非有。由是而度脫世間一切眾苦焉。以上皆集經人語。

舍利子。

即舍利弗。佛之弟子。智慧第一。因其為眾請問。故菩薩呼其名而告之。自此至終。觀自在語也。

色不異空。空不異色。色即是空。空即是色。

色乃世間一切色相。皆屬幻妄。空乃真空。永無壞滅。言世間幻色。固是虛妄。然亦不必起心厭離。真空固應修習。亦不必起心取著。若生分別。兩俱成病。當知幻色不異真空。真空不異幻

色。不當分別取捨。又幻色即是真空。真空即是幻色。要當如此體會。方是正道。

受想行識。亦復如是。

復。去聲。

○夫色之與空既不生分別。則受想行識。亦莫不皆然。自色不異空至此。乃修行之首要。

舍利子。是諸法空相。不生不滅。不垢不淨。不增不減。

相。去聲。

○是諸法者。指前五蘊而言也。空相者。真空寔相也。菩薩復呼舍利子云。若能了知五蘊諸法。即是真空寔相。則寔相之體。本無生滅。既無生滅。豈有垢淨。既無垢淨。豈有增減哉。

是故空中無色。無受想行識。

夫真空寔相之中。既無生滅垢淨增減。則亦無五蘊可知矣。

無眼耳鼻舌身意。無色聲香味觸法。

眼耳鼻舌身意。謂之六根。色聲香味觸法。謂之六塵。如色由眼見。故眼為根而色為塵也。六根六塵。合之為十二入。言真空之中。既無五蘊。則根塵亦應無也。無根塵。是為空十二入。

無眼界。乃至無意識界。

此為六識。謂眼耳鼻舌身意。各有識也。界者。如眼見處。至不見處為界。乃至者。舉始末而略其中也。此六識。合上十二入為十八界。已上根塵識三科。隨修一科。皆能悟入。

無無明。亦無無明盡。乃至無老死。亦無老死盡。

此謂十二因緣也。亦名十二有支。一曰無明。亦名煩惱。二曰行。謂造作諸業。此二支。乃過去世所作之因也。三曰識。謂起妄念。初托母胎也。四曰名色。從托胎後。生諸根行也。五曰六入。於胎中而成六根也。六曰觸。出胎後六根對六塵也。七曰受。謂領納世間好惡等事。此五支。乃現世所受之果也。八曰愛。謂貪染五欲等事也。九曰取。謂於諸境。生取著心也。十曰有。謂作有漏之因。能招未來之果。此三支。乃現世所作之因也。十一曰生。謂受未來五蘊之身也。十二曰老死。謂未來之身。既老而又死。此二支。乃來世當受之果也。此十二因緣。該三世因果。展轉因依。如輪旋轉。無有休息。眾生迷而不悟。良可悲也。蓋無明者。痴暗也。謂於本性無所明了。非昏然無知。乃背理強覺之謂也。無無明者。謂以般若智。觀此無明。其性本空。無生滅相。故曰無無明。亦無無明盡也。乃至無老死。亦無老死盡。義與前同。亦舉始末而該其中也。

無苦集滅道。

此為四諦。苦即生死苦果。集是惑業苦因。此二者。世間之法也。滅即涅槃樂果。道即道品樂因。此二者。出世間法也。說此四諦。欲令眾生知苦斷集慕滅修道。離苦得樂也。菩薩照了此境。當體空寂。故亦云無也。

無智亦無得。

自五蘊以至四諦。悉皆了知無真寔相。良由般若智慧。觀照之功。方能臻此。然若自見為有此智慧。而能空諸境界。於道為有得。倘存此見。即能礙道。故云無智亦無得。工夫至此。則人法皆空。境智俱泯。如病去藥忘矣。

以無所得故。

此結前起後之辭也。

菩提薩埵。依般若波羅密多故。心無罣礙。

菩提薩埵者。梵語。略云菩薩。般若波羅密多。解現經題。言菩薩依此般若波羅密多之法而修之。則心體圓明。自無妄想。妄想不起。則其心有何罣礙哉。

無罣礙故。無有恐怖。遠離顛倒夢想。究竟涅槃。

菩薩之人。其心既無罣礙。自無驚恐怖畏。既無恐怖。則一切顛倒夢想。亦自不生。此為三障皆空。然迷即三障。悟即三德。所謂煩惱即菩提也。故終至於涅槃之地。而無生死可名焉。倘非般若觀照之功。烏能及此。是則譬如磨鏡。垢盡而明現矣。

三世諸佛。依般若波羅密多故。得阿耨多羅三藐三菩提。

三世者。過去現在未來也。言如上之法。不惟菩薩依之修證。即三世諸佛。亦莫不因此而成正覺也。阿耨多羅三藐三菩提。華言無上正等正覺也。

故知般若波羅密多。是大神呪。是大明呪。是無上呪。是無等等呪。

是故當知般若正法。即是四種呪。蓋般若功用。能破魔障。即名大神呪。能滅痴暗。名大明呪。能顯至理。名無上呪。極妙覺果。無與等者。名無等等呪。呪者。密語。持之即隨意獲益。言此般若功德。顯密俱該。誠為殊勝正法門也。

能除一切苦。真寔不虛。

言般若功用廣大。遵而行之。必能除苦得樂。決定無疑。令人生信也。

故說般若波羅密多呪。即說呪曰。

揭諦揭諦。波羅揭諦。波羅僧揭諦。菩提薩婆訶

以上乃顯說般若。此為密說。蓋呪是佛之密語。非下凡所知。惟佛與佛。乃能知之。故不翻譯。法華疏云。呪是鬼神王之名。稱其王名。則部落敬主。故能降伏一切鬼魅。又呪者。如軍中密號。唱號相應。無所訶問。又呪者。願也。如螺贏之祝螟蛉。願其類我。佛菩薩說呪。願諸眾生。皆如己之得成正覺。能誦此呪。則所願無不成就也。

往生淨土神呪

曩謨阿彌多婆夜。哆他伽哆夜。哆地夜他。阿彌利都。婆毗。阿彌唎哆。悉耽婆毗。阿彌唎哆。毗迦蘭帝。阿彌唎哆。毗迦蘭哆。伽彌膩。伽伽那。拏多迦隸娑婆訶

若誦經薦亡者。兼誦此呪。即得往生。靈驗異常。附錄於此。以備行持。

[CBETA 贊助資訊](#)

(<https://www.cbeta.org/donation/index.php>)

自 2001 年 2 月 1 日起，CBETA 帳務由「財團法人西蓮教育基金會」承辦，並成立「財團法人西蓮教育基金會」－ CBETA 專戶，所有捐款至 CBETA 專戶皆為專款專用，歡迎各界捐款贊助。

您的捐款本協會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與聯合信用卡中心合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

[前往捐款](#)

信用卡（單次 / 定期定額）捐款

本授權書可提供單次捐款或定期定額捐款之用途。

請於下載並填妥捐款授權書後，請傳真至 02-2383-0649，並請來電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 [授權書](#) (MS Word 格式)

劃撥捐款

郵政劃撥帳號: 1 9 5 3 8 8 1 1

戶名: 財團法人西蓮教育基金會

欲指定特殊用途者, 請特別註明, 我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex- cheques, remittance, etc.,) please entitle to "The Seeland Education Foundation".
